

第二二四冊

明倫彙編

皇極典

帝紀部

(卷)
一

古今圖書集成

中華書局影印



古今圖書集成

卷一百一十五

欽定古今圖書集成明倫彙編皇極典
第三十六卷目錄

帝紀部彙考三十

梁二

武帝中

皇極典第三十六卷

帝紀部彙考三十

梁二

武帝本紀中

按梁書武帝本紀天監八年春正月辛巳與駕親祀南郊赦天下內外文武各賜勞一年壬辰魏鎮東參軍成景儒斬宿預城主嚴仲寶以城內屬二月壬戌老人星見夏四月以北巴西郡置南梁州戊申以護軍將軍始興王憺爲中衛將軍司徒行太子太傅臨川王宏爲司空揚州刺史車騎將軍領太子詹事王茂卽本號開府儀同三司丁卯魏楚王城主李國興以城內附丙子以中軍將軍丹陽尹王瑩爲右光祿大夫五月壬午詔曰學以從政殷勤往哲祿在其中抑亦前事朕思闡治綱每敦儒術軼閭閻造次以之故負裘成風甲科間出方當置諸周行飾以青紫其有能通一經始末無倦者策實之後選可量加敘錄雖復牛監羊肆寒品後門竝隨才試更勿有遺隔秋七月癸巳巴陵王蕭寶義薨八月戊午老人星見

冬十月乙巳以中軍將軍始興王憺爲鎮北將軍南兖州刺史南兖州刺史長沙王深業爲護軍將軍九年春正月乙亥以尚書令行太子少傅沈約爲左光祿大夫行少傅如故右光祿大夫王瑩爲尚書令行中撫將軍建安王偉領護軍將軍鎮北將軍南兖州刺史始興王憺爲鎮西將軍益州刺史太常卿王亮爲中書監丙子以輕車將軍晉安王綱爲南兖州刺史庚寅新作緣淮塘北岸起石頭迄東冶南岸起後渚籬門迄三橋三月己丑車駕幸國子學親臨講肆賜國子祭酒以下帛各有差乙未詔曰王子從學著自禮經貴遊咸在實惟前誥所以式廣義方克隆教道今成均大啓元良齒讓自斯以降竝宜肄業皇太子及王侯之子年在從師者可令入學于闕國遣使獻方物夏四月丁巳革選尚書五都令史用寒流林邑國遣使獻白猴一五月己亥詔曰朕達聽思治無忘日昃而百司羣務其途不一隨時適用各有攸宜若非總會衆言無以備茲親覽自今臺閣省府州郡鎮戍應有職僚之所時共集議各陳損益具以奏聞中書監王亮卒六月癸丑盜殺宣城太守朱僧勇癸酉以中撫將軍領護軍建安王偉爲鎮南將軍江州刺史閏月己丑宣城盜轉寇吳興縣太守蔡樽討平之秋七月己巳老人星見冬十二月癸未與駕幸國子學策試胄子賜訓授之司各有差

十年春正月辛丑與駕親祀南郊大赦天下居局治事賜勞二月癸卯以尚書左僕射張稷爲安北將軍青冀二州刺史郢州刺史鄱陽王恢爲護軍將軍甲辰以南徐州刺史豫章王綜爲郢州刺史輕車將軍

南康王績爲南徐州刺史戊申驛處一見荊州華容縣以左民尚書王暕爲吏部尚書辛酉與駕親祀明堂三月辛丑盜殺東莞琅邪二郡太守鄧粲以朐山引魏軍遣振遠將軍馬仙琕討之是月魏徐州刺史盧昶帥衆赴朐山夏五月癸酉安豐縣獲一角元龜丁丑領軍呂僧珍卒己卯以國子祭酒張充爲尚書左僕射太子詹事柳慶遠爲領軍將軍乙酉嘉蓮一莖三花生樂遊苑秋七月丙辰詔曰昔公卿面陳載在前史令僕陞奏列代明文所以釐彼庶績成茲羣務晉氏陵替虛誕爲風自此相因其失彌遠遂使武帳空勞無汲公之奏丹墀徒闕鄧生之履三槐八座應有務之百官宜有所論可入陳啓庶藉周爰少匡寡薄九月丙申天西北隆隆有聲赤氣下至地冬十二月癸酉山車見於臨城縣庚辰馬仙琕大破魏軍斬賊十餘萬寇復朐山城是歲初作宮城門三重樓及開二道宕昌國遣使獻方物

十一年春正月壬辰詔曰夫刑法悼辜罪不收孥禮著明文史彰前事蓋所以申其哀矜故罰有弗及近代相因厥網彌峻譬年華髮同坐入讐雖懲惡勸善宜窮其制而老幼流離良亦可愍自今逮讞之家及罪應質作若年有老小可停將送加左光祿大夫行太子少傅沈約特進鎮南將軍江州刺史建安王偉儀同三司司空揚州刺史臨川王宏進位爲太尉驃騎將軍王茂爲司空尚書令雲麾將軍王瑩進號安左將軍安北將軍青冀二州刺史張稷進號鎮北將軍二月戊辰新昌濟陽二郡野蠶成繭三月丁巳曲救揚徐二州築西靜壇於鍾山庚申高麗國遣使獻

方物四月戊子詔曰去歲胸山大殲醜類宜爲京觀用旌武功但伐罪弔民皇王盛軌掩骼埋胔仁者用心其下青州悉使收藏百濟扶南林邑國竝遣使獻方物六月辛巳以司空王茂領中權將軍九月辛亥宕昌國遣使獻方物冬十一月乙未以吳郡太守袁昂兼尚書右僕射己酉降太尉揚州刺史臨川王宏爲驍騎將軍開府同三司之儀癸丑齊宣德太妃王氏薨十二月己未以安西將軍荊州刺史安成王秀爲中衛將軍護軍將軍鄱陽王恢爲平西將軍荊州刺史

十二年春正月辛卯與駕親祀南郊赦大辟以下二月辛酉以兼尚書右僕射袁昂爲尚書左僕射丙寅詔曰掩骼埋胔義重周經樁積有加事美漢策朕向隅載懷每勤造次收藏之命亟下哀矜而寓縣遐深遵奉未洽饒然路隅往往而有言愍沉枯彌勞傷側可明下遠近各巡境界若委骸不葬或除衣莫改卽就收斂量給棺具庶夜哭之魂斯慰霑霜之骨有歸辛巳新作太極殿改爲十三間三月癸卯以湘州刺史王珍國爲護軍將軍閏月乙丑特進中軍將軍沈約卒夏四月京邑大水六月癸巳新作太廟增基九尺庚子太極殿成秋九月戊午以鎮南將軍開府儀同三司江州刺史建安王偉爲撫軍將軍儀同如故驃騎將軍開府同三司之儀揚州刺史臨川王宏爲司空領中權將軍王茂爲驃騎將軍開府同三司之儀江州刺史冬十月丁亥詔曰明堂地勢卑溼未稱乃心外可量就埤起以盡誠敬十三年春正月壬戌以丹陽尹晉安王綱爲荊州刺

史癸亥以平西將軍荊州刺史鄱陽王恢爲鎮西將軍益州刺史丙寅以朔右將軍安成王秀爲安西將軍鄧州刺史二月丁亥與駕親耕籍田赦天下孝悌力田賜爵一級老人星見三月辛亥以新除中撫將軍開府儀同三司建安王偉爲左光祿大夫夏四月辛卯林邑國遣使獻方物壬辰以郢州刺史豫章王綜爲安右將軍五月辛亥以通直散騎常侍韋叡爲中護軍六月己亥以南兗州刺史蕭景爲領軍將軍領軍將軍柳慶遠爲安北將軍雍州刺史秋七月乙亥立皇子綸爲邵陵郡王繹爲湘東郡王紀爲武陵郡王八月癸卯扶南于闐國各遣使獻方物是歲作浮山堰

十四年春正月乙巳朔皇太子冠赦天下賜爲父後者爵一級王公以下班賚各有差停遠近上慶禮丙午安左將軍尚書令王瑩進號中權將軍以鎮西將軍始興王憺爲中撫將軍辛亥與駕親祀南郊詔曰朕恭祇明祀昭事上靈臨竹宮而登泰壇服裘冕而奉蒼璧柴望既升誠敬克展思所以對越乾元弘宣德教而缺於治道政法多昧實佇羣才用康庶績可班下遠近博採英異若有確然鄉黨獨行州閭肥遯丘園不求聞達藏器待時未加收採或賢良方正孝悌力田竝卽騰奏具以名上當擢彼周行試以邦邑庶百司咸事兆民無隱又世輕世重隨時約法前以劇墨用代重辟猶念改悔其路已逕竝可省除丙寅汝陰王劉引薨二月庚寅芮芮國遣使獻方物戊戌老人星見辛丑以中護軍韋叡爲平北將軍雍州刺史新除中撫將軍始興王憺爲荊州刺史夏四月丁

丑驃騎將軍開府同三司之儀江州刺史王茂薨五月丁巳以荊州刺史晉安王綱爲江州刺史秋八月乙未老人星見九月癸亥以長沙王深業爲護軍將軍俱牙修國遣使獻方物

十五年春正月己巳詔曰觀時設教王政所先兼而利之實惟務本移風致治咸由此作頃因革之令隨事必下而張弛之要未臻厥宜民瘼猶繁廉平尚寡所以苛旋縶而載懷朝玉帛而興歎可申下四方政有不便於民者所在具條以聞守宰若清潔可稱或侵漁爲蠹分別奏上將行黜陟長吏勸課躬履堤防勿有不修致妨農事關市之賦或有未允外時參量優減舊格三月戊辰朔日有蝕之夏四月丁未以安右將軍豫章王綜兼護軍高麗國遣使獻方物五月癸未以司空揚州刺史臨川王宏爲中書監驃騎大將軍刺史如故六月丙申改作小廟畢庚子以尚書令王瑩爲左光祿大夫開府儀同三司尚書右僕射袁昂爲尚書左僕射吏部尚書王暕爲尚書右僕射秋八月老人星見芮芮河南遣使獻方物九月辛巳左光祿大夫開府儀同三司王瑩薨壬辰赦天下冬十月戊午以丹陽尹長沙王深業爲湘州刺史十一月丁卯以兼護軍豫章王綜爲安前將軍交州刺史李旻斬交州反者阮宗孝傳首京師曲赦交州壬午以雍州刺史韋叡爲護軍將軍十六年春正月辛未與駕親祀南郊詔曰朕當展思治政道未明昧且劬勞亟移星紀今太皞御氣勾芒首節升中就陽禮敬克展務承天休布茲和澤允食之家勿收今年三調其無田業者所在量宜賦給若

民有產子即依格優獨孤老鰥寡不能自存咸加賑卹班下四方諸州郡縣時理獄訟勿使冤滯並若親覽二月庚戌老人星見甲寅以安前將軍豫章王綜爲南徐州刺史三月丙子河南王遣使獻方物夏四月甲子初去宗廟牲潮溝獲白雀一六月戊申以廬陵王續爲江州刺史七月丁丑以郢州刺史安成王秀爲鎮北將軍雍州刺史八月辛丑老人星見扶南婆利國各遣使獻方物冬十月去宗廟薦修始用蔬果

十七年春正月丁巳朔詔曰夫樂所自生含識之常性厚下安宅馭世之通規朕矜此庶氓無忘待旦亟弘生聚之略每布寬恤之恩而編戶未滋遷徙尚有輕去故鄉豈其本志資業始闕自返莫由巢南之心亦何能弭今開元發歲品物惟新思俾黔黎各安舊所將使郡無曠土邑靡游民鷄犬相聞桑柘交畛凡天下之民有流移他境在天監十七年正月一日以前可開恩半歲悉聽還本獨課三年其流寓過遠者量加程日若有不樂還者即使著土籍爲民准舊課輸若流移之後本鄉無復居宅者村司三老及餘親屬卽爲詣縣告請村內官地官宅令相容受使戀本者還有所託凡坐爲市隸諸職制盜衰滅應被封籍者其田宅車牛是民生之具不得悉以沒入皆優量分畱使得自止其商賈富室亦不得頓相兼併遁叛之身罪無輕重並許首出還復民伍若有拘限自還本役並爲條格咸使知聞二月癸巳鎮北將軍雍州刺史安成王秀薨甲辰大赦天下乙卯以領石頭戌事南康王績爲南兖州刺史三月甲申老人星見丙

申改封建安王偉爲南平王夏五月戊寅驃騎大將軍揚州刺史臨川王宏薨己卯干陁利國遣使獻方物以領軍將軍蕭景爲安右將軍監揚州辛巳以臨川王宏爲中軍將軍中書監六月乙酉以益州刺史鄱陽王恢爲領軍將軍中軍將軍中書監臨川王宏以本號行司徒癸卯以國子祭酒蔡樽爲吏部尚書秋八月壬寅老人星見詔以兵驍奴婢男年登六十六女年登五十免爲平民冬十月乙亥以中軍將軍行司徒臨川王宏爲中書監司徒十一月辛亥以南平王偉爲左光祿大夫開府儀同三司

十八年春正月甲申以領軍將軍鄱陽王恢爲征西將軍開府儀同三司荊州刺史荊州刺史始興王憺爲中撫將軍開府儀同三司領軍以尚書左僕射袁昂爲尚書令尚書右僕射王暕爲尚書左僕射太子詹事徐勉爲尚書右僕射辛卯與駕親祀南郊孝悌力田賜爵一級二月戊午老人星見四月丁巳大赦天下秋七月甲申老人星見于闐扶南國各遣使獻方物

軍韋叡爲車騎將軍秋七月己卯江淮海並溢辛卯以信威將軍邵陵王綸爲江州刺史八月庚戌老人星見甲子新除車騎將軍韋叡卒九月乙亥有星晨見東方光爛如火冬十月辛亥以宣惠將軍長沙王深業爲護軍將軍辛酉以丹陽尹晉安王綱爲平西將軍益州刺史

二年春正月甲戌以南徐州刺史豫章王綜爲鎮北將軍新除益州刺史晉安王綱改爲徐州刺史辛巳與駕親祀南郊詔曰春司御氣虔恭報祀陶匏克誠蒼璧禮備思隨乾覆布茲亭育凡民有單老孤穉不能自存主者郡縣咸加收養贍給衣食每令周足以終其身又於京師置孤獨園孤幼有歸華髮不匱若終年命厚加料理尤窮之家勿收租賦戊子大赦天下二月辛丑與駕親祀明堂三月庚寅大雪平地三尺夏四月乙卯改作南北郊丙辰詔曰夫欽若昊天歷象無違躬執耒耜盡力致敬上協星鳥俯訓民時平秩東作義不在南前代因襲有乖禮制可於震方簡求沃野具茲千畝庶允舊章五月癸卯琬琰殿火延燒後宮屋三千間丁巳詔曰王公卿士今拜表賀瑞雖則百辟體國之誠朕懷良有多愧若其澤漏川泉仁被動植氣調玉燭治致太平爰降嘉祥可無慚德而政道多缺淳化未凝何以仰叶辰和遠臻冥貺此乃更彰寡薄重增其尤自今可停賀瑞六月丁卯信威將軍義州刺史文僧明以州叛入於魏秋七月丁酉假大匠卿裴選節督衆軍北討甲寅老人星見魏荊州刺史桓叔與率衆降八月丁亥始平郡中石鼓村地自開成井方六尺六寸深三十二丈冬十一

月百濟新羅國各遣使獻方物十二月戊辰以鎮東大將軍百濟王餘隆爲寧東大將軍

三年春正月庚子以尚書令袁昂爲中書監吳郡太守王暕爲尚書左僕射尚書左僕射王份爲右光祿

大夫庚戌京師地震己未以宣毅將軍廬陵王續爲雍州刺史三月己卯巴陵王蕭屏薨夏四月丁卯汝

陰王劉端薨五月壬辰朔日有蝕之既癸巳赦天下并班下四方民所疾苦咸卽以聞公卿百僚各上封

事連率郡國舉賢良方正直言之士秋八月辛酉作二郊及籍田並畢班賜工匠各有差甲子老人星見

婆利白題國各遣使獻方物冬十月丙子加中書監袁昂中衛將軍十一月甲午撫軍將軍開府儀同三

司領軍將軍始興王憺薨辛丑以太子詹事蕭淵藻爲領軍將軍

四年春正月辛卯與駕親祀南郊大赦天下應諸窮疾咸加賑恤并班下四方時理獄訟丙午與駕親祀

明堂二月庚午老人星見乙亥躬耕籍田詔曰夫耕籍之義大矣哉乘盛由之而興禮節因之以著古者

哲王咸用此作眷言八政致茲于畝公卿百辟恪恭其儀九推畢禮馨香靡替兼以風雲叶律氣象光華

屬覽休辰思加獎勵可班下遠近廣闢良疇公私畎畝務盡地利若欲附農而糧種有乏亦加貸卹每使

優遍孝悌力田賜爵一級豫耕之司尅日勞酒三月壬寅以鎮右將軍豫章王綜爲平北將軍南兖州刺

史六月乙丑分益州置信州分交州置愛州分廣州置成州南定州合州建州分霍州置義州秋八月丁卯老人星見冬十月庚午以中書監中衛將軍袁昂

爲尚書令卽本號開府儀同三司己卯護軍將軍昌義之卒十一月癸未朔日有蝕之太白晝見甲辰尚書左僕射王暕卒十二月戊午始鑄鐵錢狼牙修國遣使獻方物

五年春正月以左光祿大夫開府儀同三司南平王偉爲鎮衛大將軍改領右光祿大夫儀同三司如故

征西將軍開府儀同三司荊州刺史鄱陽王恢進號驃騎大將軍太尉卿夏侯寬爲中護軍右光祿大夫

王份爲左光祿大夫加特進辛卯平北將軍南兖州刺史豫章王綜進號鎮北將軍平西將軍雍州刺史

晉安王綱進號安北將軍二月庚午特進左光祿大夫王份卒丁丑老人星見三月甲戌分揚州江州置

東揚州夏四月乙未以雲麾將軍南康王績爲江州刺史六月乙酉龍關於曲阿王陵因西行至建陵城

所經處樹木倒折開地數十丈戊子以會稽太守武陵王紀爲東揚州刺史庚子以員外散騎常侍元樹

爲平北將軍北齊兖二州刺史率衆北伐秋七月辛未賜北討義客位一階八月庚寅徐州刺史成景雋

尅魏童棧九月戊申又尅睢陵城戊午北兖州刺史趙景悅圍荊山王茂宣毅將軍裴邃襲壽陽入羅城

弗尅冬十月戊寅裴邃元樹攻魏建陵城破之辛巳又破曲木掃齒將軍彭寶孫尅琅邪甲申又尅檀丘

城辛卯裴邃破狄城丙申又尅壁城遂進屯黎將壬寅魏東海太守韋敬欣以司吾城降定遠將軍開二

太守曹世宗破魏曲陽城甲辰又尅秦墟魏鄆潘溪守悉皆棄城走十一月丙辰彭寶孫尅東莞城壬戌裴邃攻壽陽之安城尅之丙寅魏馬頭安城並來降

十二月戊寅魏荊山城降乙巳武勇將軍李國興攻平靜關尅之辛丑信威長史楊法乾攻武陽關壬寅攻峴關並尅之

六年春正月丙午安北將軍晉安王綱遣長史柳津破魏南鄉郡司馬董當門破魏晉城庚戌又破馬圈

彫陽二城辛亥與駕親祀南郊大赦天下庚申魏鎮東將軍徐州刺史元法僧以彭城內附己巳雍州前

軍尅魏新蔡郡詔曰廟謨已定王略方舉侍中領軍將軍西昌侯淵藻可便親戎以前啓行鎮北將軍南

兖州刺史豫章王綜董馭雄桀風馳次邁其餘衆軍計日差遣初中後師善得嚴辦朕當六軍雲動龍舟

濟江癸酉尅魏鄭城甲戌以魏鎮東將軍徐州刺史元法僧爲司空二月丁丑老人星見庚辰南徐州刺

史廬陵王續還朝稟承戎略乙未趙景悅下魏龍亢城三月丙午歲星見南斗賜新附民長復除應諸罪

失一無所問己酉行幸白下城履行六軍頓所乙丑鎮北將軍南兖州刺史豫章王綜權頓彭城總督衆

軍并攝徐州府事己巳以魏假平東將軍元景隆爲衛州刺史魏征齒將軍元景仲爲廣州刺史夏五月

己酉築宿預堰又修曹公堰於濟陰太白晝見壬子遣中護軍夏侯寬督壽陽諸軍事北伐六月庚辰豫

章王綜奔於魏魏復據彭城秋七月壬戌大赦天下八月丙子以散騎常侍曹仲宗兼領軍壬午老人星

見十二月戊子邵陵王綸有罪免官削爵土壬辰京師地震

七年春正月辛丑朔赦殊死以下丁卯滑國遣使獻方物二月甲戌北伐衆軍解嚴河南王遣使獻方物

丁亥老人星見三月乙卯高麗國遣使獻方物夏四月乙酉太尉臨川王安薨南州津改置校尉增加俸秩詔在位羣臣各舉所知凡是清吏咸使薦聞州年舉二人大郡一人六月己卯林邑國遣使獻方物秋九月己酉驃騎大將軍開府儀同三司荊州刺史鄱陽王恢薨冬十月辛未以丹陽尹湘東王繹為荊州刺史十一月庚辰大赦天下是日丁貴嬪薨辛巳夏侯宣胡龍牙元樹曹世宗等衆軍克壽陽城丁亥放魏揚州刺史李憲還北以壽陽置豫州合肥改為南豫州以中護軍夏侯宣為豫南豫二州刺史平西將軍鄧州刺史元樹進號安西將軍魏新野太守以郡降

大通元年春正月乙丑以尚書左僕射徐勉為尚書僕射中衛將軍詔曰朕思利兆民惟日不足氣象環回每弘優簡百官俸祿本有定數前代以來皆多許准項者因循未遑改革自今以後可長給見錢依時即出勿令通緩凡散失官物不問多少竝從原有惟事涉軍儲取公私見物不在此例辛未與駕親祀南郊詔曰奉時昭事虔薦蒼璧思承天德惠此下民凡因事去土流移他境者竝聽復宅業蠲役五年尤貧之家勿收三調孝悌力田賜爵一級是月司州刺史夏侯夔進軍三關所至皆尅三月辛未與駕幸同泰寺捨身甲戌還宮赦天下改元以左衛將軍蕭淵藻為中護軍林邑師子國各遣使獻方物夏五月丙寅成景雋尅魏臨潼竹邑秋八月壬辰老人星見冬十月庚戌魏東豫州刺史元慶和以渦陽內屬甲寅曲赦東豫州十一月丁卯以中護軍蕭淵藻為北討都

督征北大將軍鎮渦陽戊辰加尚書令中衛將軍開府儀同三司袁昂中書監以渦陽置西徐州高麗國遣使獻方物

二年春正月庚申司空元法僧以本官領中軍將軍中書監尚書令中衛將軍開府儀同三司袁昂進號中撫大將軍衛尉卿蕭昂為中領軍乙酉芮芮國遣使獻方物二月甲午老人星見是月築寒山堰三月壬戌以江州刺史南康王績為安右將軍夏四月辛丑魏鄧州刺史元願達以義陽內附置北司州時魏大亂其北海王元顥臨淮王元或汝南王元悅竝來奔其北青州刺史元世儁南荊州刺史李志亦以地降六月丁亥魏臨淮王元或求還本國許之冬十月丁亥以魏北海王元顥為魏主遣東宮直閣將軍陳慶之衛送還北魏豫州刺史鄧獻以地內屬

中大通元年正月辛酉與駕親祀南郊大赦天下孝悌力田賜爵一級甲子魏汝南王元悅求還本國許之辛巳與駕親祀明堂二月甲申以丹陽尹武陵王紀為江州刺史辛丑芮芮國遣使獻方物三月丙辰以河南王阿羅眞為軍西將軍西秦河沙三州刺史庚辰以中護軍蕭淵藻為中權將軍夏四月癸未以安右將軍南康王績為護軍將軍癸巳陳慶之攻魏梁城拔之進屠考城擒魏濟陰王元暉業五月戊辰尅大梁癸酉尅虎牢城魏主元子猷棄洛陽走河北乙亥元顥入洛陽六月壬午大赦天下辛亥魏淮陰太守晉鴻以湖陽城內屬閏月己未安右將軍護軍南康王績薨己卯魏尅朱榮攻殺元顥復據洛陽秋九月辛巳朱雀航華表災以安北將軍羊侃為青冀

二州刺史癸巳與駕幸同泰寺設四部無遮大會因捨身公卿以下以錢一億萬奉贖冬十月己酉與駕還宮大赦改元十二月丙戌加中撫大將軍開府儀同三司袁昂中書監加鎮衛大將軍開府儀同三司南平王偉太子少傅加金紫光祿大夫蕭琛陸杲竝特進司空中軍將軍元法僧進號車騎將軍中權將軍蕭淵藻為中護軍將軍中領軍蕭昂為領軍將軍戊子魏巴州刺史嚴始欣以城降十二月丁巳盤盤國遣使獻方物

二年春正月戊寅以雍州刺史晉安王綱為驃騎大將軍揚州刺史南徐州刺史廬陵王績為平北將軍雍州刺史癸未老人星見夏四月庚申大雨雹壬申以河南王佛輔為寧西將軍西秦河二州刺史六月丁巳遣魏太保汝南王元悅還北為魏主庚申以魏尚書左僕射范遵為安北將軍司州牧隨元悅北討林邑國遣使獻方物壬申扶南國遣使獻方物秋八月庚戌與駕幸德陽堂設絲竹會祖送魏主元悅山賊聚結寇會稽郡所部縣九月壬午假昭武將軍湛海珍節以討之

三年春正月辛巳與駕親祀南郊大赦天下孝悌力田賜爵一級丙申以魏尚書僕射鄭先護為征北大將軍二月辛丑與駕親祀明堂甲寅老人星見乙卯特進蕭琛卒乙丑以廣州刺史元景隆為安右將軍夏四月乙巳皇太子統薨六月丁未以前太子詹事蕭淵猷為中護軍尚書僕射徐勉加特進右光祿大夫丹陽國遣使獻方物癸丑立昭明太子子南徐州刺史華容公權為豫章郡王枝江公譽為河東郡王

曲阿公督爲岳陽郡王秋七月乙亥立晉安王綱爲皇太子大赦天下賜爲父後者及出處忠孝文武清勤並賜爵一級乙酉以待中五兵尚書謝舉爲吏部尚書庚寅詔曰推恩六親義彰九族班以侯爵亦曰惟允凡是宗戚有服屬者並可賜沐食鄉亭侯各隨遠近以爲差次其有曜親自依舊章壬辰以吏部尚書何敬容爲尚書右僕射癸巳老人星見九月庚午以太子詹事蕭淵藻爲征北將軍南兖州刺史戊寅狼牙修國奉表獻方物冬十月己酉行幸同泰寺高祖升法座爲四部衆說大般涅槃經義訖於乙卯前樂山縣侯蕭正則有罪流徙至是招誘亡命欲寇廣州在所討平之十一月乙未行幸同泰寺高祖升法座爲四部衆說摩訶般若波羅密經義訖於十二月辛丑是歲吳興郡生野穀堪食

四年春正月丙寅朔以鎮衛大將軍開府儀同三司南平王偉進位大司馬司空元法僧進位太尉尚書令中權大將軍開府儀同三司袁昂進位司空立臨川靖惠王宏子正德爲臨賀郡王戊辰以丹陽尹邵陵王綸爲揚州刺史太子右衛率薛法護爲平北將軍司州牧衛送元悅入洛庚午立嫡皇孫大器爲宣城郡王癸未魏南兖州刺史劉世明以城降改魏南兖州爲譙州以世明爲刺史二月壬寅老人星見新除太尉元法僧還北爲東魏主以安右將軍元景隆爲征北將軍徐州刺史雲麾將軍楊侃爲安北將軍兖州刺史散騎常侍元樹爲鎮北將軍庚戌新除揚州刺史邵陵王綸有罪免爲庶人壬子以江州刺史武陵王紀爲揚州刺史領軍將軍蕭昂爲江州刺史

丙辰邵陵王復鹿一三月庚午侍中領國子博士蕭子顯上表置制旨孝經助教一人人生十人專通高祖所釋孝經義夏四月壬申盤盤國遣使獻方物秋七月甲辰星隕如南八月丙子特進陸杲卒九月乙巳以太子詹事南平王世子恪爲領軍將軍平北將軍雍州刺史廬陵王續爲安北將軍西中郎將荊州刺史湘東王繹爲平西將軍司空袁昂領尚書令十一月己酉高麗國遣使獻方物十二月庚辰以太尉元法僧爲驃騎大將軍開府同三司之儀鄂州刺史五年春正月辛卯與駕親祀南郊大赦天下孝悌力田賜爵一級先是一日東南郊令解滌之等到郊所履行忽聞空中有異香三隨風至及將行事奏樂迎神畢有神光滿壇上朱紫黃白雜色食頃方滅兼太宰武陵王紀等以聞戊申京師地震己酉長星見辛亥與駕親祀明堂癸丑以宣城王大器爲中軍將軍河南國遣使獻方物二月癸未行幸同泰寺設四部大會高祖升法座發金字摩訶般若經題訖于己丑老人星見三月丙辰大司馬南平王偉薨夏四月癸酉以御史中丞臧盾兼領軍五月戊子京邑大水御道通船六月己卯魏建義城主蘭寶殺魏東徐州刺史以下邳城降秋七月辛卯改下邳爲武州八月庚申以前徐州刺史元景隆爲安右將軍老人星見甲子波斯國遣使獻方物甲申中護軍蕭淵猷卒九月己亥以輕車將軍臨賀王正德爲中護軍甲寅以尚書司空袁昂爲特進右光祿大夫司空如故盤盤國遣使獻方物冬十月庚申以尚書右僕射何敬容爲尚書左僕射吏部尚書謝舉爲尚書右僕射侍中

國子祭酒蕭子顯爲吏部尚書六年春二月癸亥與駕親耕籍田大赦天下孝悌力田賜爵一級三月己亥以行河南王可柰振爲西秦河二州刺史河南王甲辰百濟國遣使獻方物夏四月丁卯葵惑在南斗秋七月甲辰林邑國遣使獻方物八月己未以南梁州刺史武興王楊紹先爲秦南秦二州刺史冬十月丁卯以信武將軍元慶和爲鎮北將軍率衆北伐閏十二月丙午西南有雷聲二大同年春正月戊申朔改元大赦天下二月己卯老人星見辛巳與駕親祀明堂丁亥與駕躬耕籍田辛丑高麗國丹國各遣使獻方物二月辛未滑國王安樂薩丹王遣使獻方物夏四月庚子波斯國獻方物甲辰以魏鎮東將軍劉濟爲徐州刺史壬戌以安北將軍廬陵王續爲安南將軍江州刺史秋七月乙卯老人星見辛卯扶南國遣使獻方物冬十月辛卯以前南兖州刺史蕭淵藻爲護軍將軍十一月丁未中衛將軍特進右光祿大夫徐勉卒壬戌北梁州刺史蘭欽攻漢中尅之魏梁州刺史元羅降癸亥賜梁州歸附者復除有差甲子雄勇將軍北益州刺史陰平王楊法深進號平北將軍月行左角星十二月乙酉以魏北徐州刺史羊徽逸爲平北將軍十二月戊戌以平西將軍秦南秦二州刺史武興王楊紹先進號車騎將軍平北將軍北益州刺史陰平王楊法深進號驃騎將軍辛丑平西將軍荊州刺史湘東王繹進號安西將軍二年春正月甲辰以兼領軍臧盾爲中領軍二月乙亥與駕躬耕籍田丙戌老人星見三月庚申詔曰政

在養民德存被物上令如風民應如草朕以寡德運屬時來撥亂反正脩焉三紀不能使重門不閉守在海外疆場多阻車書未一民疲轉輸士勞邊防徹田爲糧未得頓止治道不明政用多僻百辟無沃心之言四聰闕飛耳之聽州輟刺舉郡忘共治致使失理負謗無由聞達侮文弄法因事生奸肺石空陳懸鐘徒設書不云乎股肱惟人良臣惟聖實賴賢佐匡其不及凡厥在朝各獻謏言政治不便於民者可悉陳之若在四遠刺史二千石長吏竝以奏聞細民有言事者咸爲申達朕將親覽以紓其過文武在位舉爾所知公侯將相隨才擢用拾遺補闕勿有所隱夏四月乙未以驛騎大將軍開府同三司之儀元法僧爲太尉領軍師將軍先是尚書右丞江子四上封事極言政治得失五月癸卯詔曰古人有言屋漏在上知之下朕所鍾過不能自覺江子四等封事如上尚書可時加檢括於民有蠹患者便卽勒停宜速詳啓勿致淹緩乙巳以魏前梁州刺史元羅爲征北大將軍青冀二州刺史六月丁亥詔曰南郊明堂陵廟等令與朝請同班於事爲輕可改視散騎侍郎冬十月乙亥詔大舉北伐十一月己亥詔北伐衆班師辛亥京師地震十二月壬申魏請通和詔許之丁酉以吳興太守駙馬都尉利亭侯張纘爲吏部尚書三年春正月辛丑與駕親祀南郊大赦天下孝悌力田賜爵一級是夜朱雀門災壬寅天無雲雨灰黃色癸卯以中書令卻陵王綸爲江州刺史二月乙酉老人星見丁亥與駕親耕籍田己丑以尚書左僕射何敬容爲中權將軍護軍將軍蕭淵藻爲安右將軍尚

書左僕射以尚書左僕射謝舉爲右光祿大夫庚寅以安南將軍廬陵王續爲中衛將軍護軍將軍三月戊戌立昭明太子子譽爲武昌郡王譽爲義陽郡王夏四月丁卯以南郡彭彭城二郡太守河東王譽爲南徐州刺史五月丙申以前揚州刺史武陵王紀復爲揚州刺史六月青州朐山境隕霜秋七月癸卯魏遣使來聘己酉義陽王譽薨是月青州雪害苗稼八月甲申老人星見辛卯與駕幸阿育王寺赦天下九月南兗州大饑是月北徐州境內旅生稻稗二千許頃閏月甲子安西將軍荊州刺史湘東王繹進號鎮西將軍揚州刺史武陵王紀爲安西將軍益州刺史冬十月丙辰京師地震是歲饑四年春正月庚辰以中將軍宣城王大器爲中軍大將軍揚州刺史二月己亥與駕親耕籍田三月戊寅河南國遣使獻方物癸未芮芮國遣使獻方物五月甲戌魏遣使來聘秋七月己未以南琅邪彭城二郡太守岳陽王督爲東揚州刺史癸亥詔以東冶徒李引之降如來真形舍利大赦天下八月甲辰詔南兗北徐西徐東徐青冀南北青武仁潼睢等十二州旣經饑饉曲赦逋租宿負勿收今年三調冬十二月丁亥兼國子助教皇侃表上所撰禮記義疏五十卷五年春正月乙卯以護軍將軍廬陵王續爲驃騎將軍開府儀同三司安右將軍尚書左僕射蕭淵藻爲中衛將軍開府儀同三司中權將軍丹陽尹何敬容以本號爲尚書令吏部尚書張纘爲尚書僕射都官尚書劉孺爲吏部尚書丁巳御史中丞參禮儀事賀琛奏今南北二郊及籍田往還並宜御登不復乘輅

二郊請用素輦籍田往還乘常輦皆以侍中陪乘停大將軍及太僕詔付尚書博議施行改素輦名大同輦昭祀宗廟乘玉輦辛未車駕親祀南郊詔孝悌力田及州閭鄉黨稱爲善人者各賜爵一級并勒屬所屬以時騰上三月己未詔曰朕四聰既闕五識多蔽畫可外牒或致紕繆凡是政事不便於民者州郡縣即時皆言勿得欺隱如使怨訟當境任失而今而後以爲未准秋七月己卯以驛騎將軍開府儀同三司廬陵王續爲荊州刺史湘東王繹爲護軍將軍安右將軍八月乙酉扶南國遣使獻生犀及方物九月庚申以都官尚書到溉爲吏部尚書冬十一月乙亥魏遣使來聘十二月癸未以吳郡太守謝舉爲中書監新除中書令鄱陽王範爲中領軍六年春正月庚戌朔曲赦司豫徐兗四州二月己亥與駕親耕籍田丙午以江州刺史卻陵王綸爲平西將軍郢州刺史雲麾將軍豫章王權爲江州刺史秦郡獻白鹿一夏四月癸未詔曰命世興王嗣賢傳業聲稱不朽人代徂遷二寶以位三恪義在時事浸遠宿草榛蕪望古興懷言念愴然晉宋齊三代諸陵有職司者勒加守護勿令細民妄相侵毀作兵有少補使充足前無守視並可量給五月戊寅以前青冀二州刺史元羅爲右光祿大夫己卯河南王遣使獻馬及方物六月丁未平陽縣獻白鹿一秋七月丁亥魏遣使來聘八月戊午赦天下辛未詔曰經國有體必詢諸朝所以尚書置令僕丞郎旦旦上朝以議時事前共籌懷然後奏聞頃者不爾每有疑事倚立求決古人有云主非堯舜何得發言便是是故放勳之聖

猶咨四岳重華之獻亦待多士豈朕寡德所能獨斷自今尙書中有疑事前於朝堂參議然後啓聞不得習常其軍機要切前須諮審自依舊典盤盤國遣使獻方物九月移安州置定遠郡受北徐州都督定遠郡改屬安州始平太守崔頌表獻嘉禾一莖十二穗戊戌特進左光祿大夫司空袁昂薨冬十一月己卯曲赦京邑十二月壬子江州刺史豫章王憺薨以護軍將軍湘東王繹爲鎮南將軍江州刺史置桂州於湘州始安郡受湘州督省南桂林等二十四郡悉改屬桂州

七年春正月辛巳輿駕親祀南郊赦天下其有流移及失桑梓者各還田宅蠲課五年辛丑輿駕親祀明堂二月乙巳以行宕昌王梁彌泰爲平西將軍河涼二州刺史宕昌王辛亥輿駕躬耕藉田乙卯京師地震丁巳以中領軍都陽王範爲鎮北將軍雍州刺史三月乙亥宕昌王遣使獻馬及方物高麗百濟滑國各遣使獻方物夏四月戊申魏遣使來聘五月癸巳以侍中南康王會理兼領軍秋九月戊寅芮芮國遣使獻方物冬十月丙午以侍中劉儒爲吏部尚書十一月丙子詔停在所役使女丁丁丑詔曰民之多幸國之不幸恩澤屢加彌長姦盜朕亦知此之爲病矣如不優赦非仁人之心凡厥讐耗逋負起今年十一月九日昧爽以前在民間無問多少言上尙書督所未入者皆赦除之又詔曰用天之道分地之利蓋先聖之格訓也凡是田桑廢宅沒入者公創之外悉以分給貧民皆使量其所以受田分如聞頃者豪家富室多占取公田貴價僦稅以與貧民傷時害政

爲蠶已甚自今公田悉不得假與豪家已假者特聽不追其若富室給貧民種糧其營作者不在禁例己丑以金紫光祿大夫臧盾爲領軍將軍十二月壬寅詔曰古人云一物失所如納諸隍未是切言也朕寒心消志爲日久矣每當食投箸方眠徹枕獨坐懷憂憤慨申旦非爲一人萬姓故耳州牧多非良才守宰虎而傅翼楊阜是故憂憤實誼所以流涕至於民間誅求萬端或供廚帳或供廢庫或遣使命或待賓客皆無自費取給於民又復多遣遊軍稱爲遏防姦盜不止暴掠繁多或求供設或責腳步又行劫縱更相枉逼良人命盡富室財殫此爲怨酷非止一事亦頻禁斷猶自未已外司明加聽採隨事舉奏又復公私傳屯邸治爰至僧尼當其地界止應依限守視乃至廣加封固越界分斷水陸採捕及以樵蘇遂致細民措手無所凡自今有越界禁斷者禁斷之身皆以軍法從事若是公家創內止不得輒自立屯與公競作以收私利至百姓樵採以供煙爨者悉不得禁及以採捕亦勿問問若不遵承皆以死罪結正魏遣使來聘丙辰於宮城西立士林館延集學者是歲交州土民李賁攻刺史蕭諮諮輸賂得還越州

八年春正月安城郡民劉敬躬挾左道以反內史蕭說委郡東奔敬躬據郡進攻廬陵取豫章妖黨遂至數萬前逼新淦柴桑二月戊戌江州刺史湘東王繹遣中兵曹子郢討之三月戊辰大破之擒敬躬送京師斬於建康市是月於江州新蔡高塘立頌平屯壘作蠻田遣越州刺史陳侯羅州刺史甯巨安州刺史李智愛州刺史阮漢同征李賁於交州

九年春閏月丙申地震生毛二月甲戌使江州民三十家出奴婢一戶配送司州三月以太子詹事謝舉爲尚書僕射夏四月林邑王破德州攻李賁賁將范修又被林邑王於九德林邑王敗走冬十一月辛丑安西將軍益州刺史武陵王紀進號征西將軍開府儀同三司十二月壬戌領軍將軍臧盾卒以輕車將軍河東王譽爲領軍將軍

十年春正月李賁於交趾竊位號署置百官三月甲午輿駕幸蘭陵謁建寧陵辛丑至修陵壬寅詔曰朕自違桑梓五十餘載乃眷東顧靡日不思今四方款關海外有截獄訟稍簡國務小閒始獲展散園陵但增感慟故鄉老少接踵遠至情貌孜孜若歸於父宜有以慰其此心竝可錫位一階并加頒賚所經縣邑無出今年租賦監所責民蠲復二年並普資內外從官軍主左右錢米各有差因作還舊鄉詩癸卯詔園陵職司恭事勤勞竝錫位一階并加沾賚丁未仁威將軍南徐州刺史臨川王正義進號安東將軍己酉幸京口城北固樓改名北顧庚戌幸回賓亭宴帝鄉故老及所經近縣奉迎候者少長數千人各賚錢二千夏四月乙卯輿駕至自蘭陵詔錄寡孤獨九貧者贍卹各有差五月丁酉尙書令何敬容免秋九月己丑詔曰今茲遠近雨澤調適其穫已及冀必萬箱宜使百姓因斯安樂凡天下罪無輕重已發覺未發覺討捕未擒者皆赦宥之侵割耗散官物無問多少亦悉原除田者荒廢水旱不作無當時文例應追稅者并作田不登公格者並停各備臺州以文最逋殿罪悉從原其有因饑逐食離鄉去土悉聽復業蠲課五

年冬十二月大雪平地三尺

十一年春三月庚辰詔曰皇王在昔澤風未遠故端居元扈拱默巖廊自大道既淪澆波斯逝勳競日滋情僞彌作朕負辰君臨百年將半宵漏未分躬勞政事曰日西浮不遑餐飯退居猶於布素含咀匪過黎藿寧以萬乘爲貴四海爲富惟欲億兆康寧下民安乂雖復三思行事而百慮多失凡遠近分置內外條流四方所立屯傳邸冶市埭桁渡津稅田園新舊守宰遊軍戍邏有不便於民者尚書州郡各速條上當隨言除省以舒民患夏四月魏遣使來聘冬十月己未詔曰堯舜以來便開贖刑中年依古許罪身入賞吏下因此不無姦猾所以一日復敕禁斷川流難壅人心惟危既乖內典慈悲之義又傷外教好生之德書云與殺不辜寧失不經可復開罪身皆聽入贖

欽定古今圖書集成明倫彙編皇極典

第三十七卷目錄

帝紀部彙考三十一

梁三

武帝下

元帝

簡文帝

敬帝

皇極典第三十七卷

帝紀部彙考三十一

梁三

武帝本紀下

按梁書武帝本紀中大同元年春正月丁未曲阿縣建陵隧口石驛驛動有大蛇闕隧中其一被傷奔走癸丑交州刺史楊驃冠交趾嘉寧城李賁竄入獠洞交州平三月乙巳大赦天下凡主守割盜放散官物及以軍糧器下凡是赦所不原者起十一年正月以前皆悉從恩十一年正月已後悉原加責其或為事逃叛流移因饑以後亡鄉失土可聽復業蠲課五年停其徭役其被拘之身各還本郡舊業若在皆悉還之庚戌法駕出同泰寺大會停寺省講金字三慧經夏四月景戌於同泰寺解講設法會大赦改元孝悌力田為父後者賜爵一級資宿衛文武各有差是夜同泰寺災六月辛巳竟天有聲如風雨相擊薄秋七月辛酉以武昌王警為東揚州刺史甲子詔曰禽獸知母而不知父無賴子弟過於禽獸至於父母泣皆

不知多觸王憲致及老人者年禁執大可傷慙自今有犯罪者父母祖父母勿坐唯大逆不預今恩景寅詔曰朝四而暮三衆狙皆喜名實未虧而喜怒為用頃聞外間多用九陌錢陌減則物賈陌足則物賤非物有貴賤是心有顛倒至於遠方日更滋甚豈直國有異政乃至家有殊俗徒亂王制無益民財自今可通用足陌錢令書行後百日為期若猶有犯男子謫運女子質作竝同三年八月丁丑東揚州刺史武昌王警薨以安東將軍南徐州刺史臨川王正義即本號為東揚州刺史丹陽尹邵陵王綸為鎮東將軍南徐州刺史渴槃陁國遣使獻方物冬十月癸酉汝陰王劉哲薨以前東揚州刺史岳陽王督為雍州刺史太清元年正月壬寅驃騎大將軍開府儀同三司荊州刺史廬陵王續薨以鎮南將軍江州刺史湘東王繹為鎮西將軍荊州刺史辛酉與駕親祀南郊詔曰天行彌綸覆幬之功博乾道變化資始之德成朕沐浴齋宮虔恭上帝祇事標燦高標太一大禮克遂感慶兼懷思與億兆同其福惠可大赦天下九窮者無出即年租調清議禁錮竝皆宥釋所討連叛巧籍隱年闔丁匿口開恩百日各令自首不問往罪流移他鄉聽復宅業蠲課五年孝悌力田賜爵一級居局治事實勞二年可班下遠近博採英異或德茂州閭道行鄉邑或獨行特立不求聞達咸使言上以時招聘甲子與駕親祀明堂二月己卯白虹貫日庚辰魏司徒侯景求以豫章廣穎洛陽西揚東荆北荆襄東豫南兗西兗齊等十三州內屬壬午以景為大將軍封河南王大行臺承制如鄧禹故事丁亥與駕躬耕藉

田三月庚子高祖幸同泰寺設無遮大會捨身公卿等以錢一億萬奉贖甲辰遣司州刺史羊鴉仁兗州刺史桓和仁州刺史湛海珍等應接北豫州夏四月丁亥與駕還宮大赦天下改元孝悌力田為父後者賜爵一級在朝羣臣宿衛文武並加頒賚五月丁酉與駕幸德陽堂宴羣臣設絲竹樂六月戊辰以前雍州刺史鄱陽王範為征北將軍總督漢北征討諸軍事秋七月庚申羊鴉仁入懸瓠城甲子詔曰二豫分置其來久矣今汝穎寇定可依前代故事以懸瓠為豫州壽春為南豫改合肥為合州北廣陵為淮州項城為殷州合州為南合州八月乙丑王師北伐以南豫州刺史蕭淵明為大都督詔曰今汝南新復嵩嶺載清贍言遺黎有勞鑒寐宜寬惠與之更始應是緣邊初附諸州部內百姓先有負罪流亡逃叛入北一皆曠蕩不問往咎并不得挾以私讎而相報復若有犯者嚴加裁問戊子以大將軍侯景錄行臺尚書事九月癸卯王遊苑成庚戌與駕幸苑冬十一月魏遣大將軍慕容紹宗等至寒山景午大戰淵明敗績及北兗州刺史胡貴孫等竝陷魏紹宗進圍潼州十二月戊辰遣太子舍人元貞還北為魏主辛巳以前征北將軍鄱陽王範為安北將軍南豫州刺史二年春正月戊戌詔在位各舉所知己亥魏陷洛陽辛丑以尚書僕射謝舉為尚書令守吏部尚書王克為尚書僕射甲辰豫州刺史羊鴉仁殷州刺史羊思達竝棄城走魏進據之乙卯以大將軍侯景為南豫州牧安北將軍南豫州刺史鄱陽王範為合州刺史三月甲辰撫東將軍高麗王高延卒以其息為寧東

將軍高麗王樂浪公己未以鎮東將軍南徐州刺史邵陵王綸爲平南將軍湘州刺史同三司之儀中衛將軍開府儀同三司蕭淵藻爲征東將軍南徐州刺史是日屈獠洞斬李賁傳首京師夏四月景子詔在朝及州郡各舉清人任治民者皆以禮送京師戊寅以護軍將軍河東王譽爲湘州刺史五月辛丑以新除中書令邵陵王綸爲安前將軍開府儀同三司前湘州刺史張纘爲領軍將軍辛亥曲赦交愛德三州癸丑詔曰爲國在於多士寧下寄於得人朕暗於行事尤闕治道孤立在上如臨深谷凡爾在朝咸思匡救獻替可否用相啓沃班下方岳傍求俊又窮其屠釣書其嚴穴以時奏聞是月兩月夜見秋八月乙未以右衛將軍朱異爲中領軍戊戌侯景舉兵反擅攻馬頭木柵荆山等戌甲辰以安前將軍開府儀同三司邵陵王綸都督衆軍討景曲赦南豫州九月景寅加左光祿大夫元羅鎮右將軍冬十月侯景襲譙州執刺史蕭泰丁未景進攻歷陽太守莊鐵降之戊申以新除光祿大夫臨賀王正德爲平北將軍都督京師諸軍屯丹陽郡己酉景自橫江濟於采石辛亥景師至京臨賀王正德率衆附賊十一月辛酉賊攻陷東府城害南浦侯蕭推中軍司馬楊敷庚辰邵陵王綸帥武州刺史蕭弄璋前譙州刺史趙伯超等入援京師頓鍾山愛敬寺乙酉綸進軍湖頭與賊戰敗績景戌安北將軍鄱陽王範遣世子嗣雄信將軍裴之高率衆入援次於張公洲十二月戊申天西北中裂有光如火尚書令謝舉卒景辰司州刺史柳仲禮前衡州刺史韋粲高州刺史李遷仕前司州刺史羊

鴉仁等並率軍入援推仲禮爲大都督三年春正月丁巳朔柳仲禮帥衆分據南岸是日賊濟軍於青塘襲破韋粲營衆拒戰死庚申邵陵王綸東揚州刺史臨成公大連等帥兵集南岸乙丑中領軍朱異卒景寅以司農卿傅岐爲中領軍戊辰高州刺史李遷仕天門太守樊文皎進軍青溪東爲賊所破文皎死之壬午樊感守心乙酉太白晝見二月丁未南兗州刺史南康王會理前青冀二州刺史湘潭侯蕭退帥江州之衆頓於蘭亭苑庚戌安北將軍合州刺史鄱陽王範以本號開府儀同三司三月戊午前司州刺史羊鴉仁等進軍東府北與賊戰大敗己未皇太子妃王氏薨丁卯賊攻陷宮城縱兵大掠己巳賊矯詔遣石城公大款解外援軍庚午侯景自爲都督中外諸軍事大丞相錄尚書辛未援軍各退散景子樊感守心壬午新除中領軍傅岐卒夏四月己丑京師地震景申地又震己酉高祖以所求不供憂憤寢疾是月青冀二州刺史明少遐東徐州刺史湛海珍北青州刺史王泰伯各舉州附於魏五月景辰高祖崩於淨居殿時年八十六辛巳遷大行皇帝梓宮於太極前殿冬十一月追尊爲武皇帝廟曰高祖乙卯葬於脩陵高祖生知淳孝年六歲獻皇太后崩水漿不入口三日哭泣哀苦有過成人內外親黨咸加敬異及丁文皇帝薨時爲齊隨王諮議隨府在荆鎮髮髯奉聞便投笏星馳不復寢食倍道就路憤風驚浪不暫停止高祖形容本壯及還至京都銷毀骨立親表士友不復識焉望宅奉諱氣絕久之每哭輒歔血數升服內不復嘗米惟資大麥日止二溢拜掃

山陵涕淚所灑松草變色及居帝位卽於鍾山造大愛敬寺青溪邊造智度寺又於臺內立至敬等殿又立七廟堂月中再過設淨饌每至展拜恆涕泗滂沱哀動左右加以文思欽明能事畢究少而篤學洞達儒元雖萬機多務猶卷不輟手然燭側光常至戊夜造制旨孝經義周易講疏及六十四卦二繫文言序卦等義樂社義毛詩答問春秋答問尚書大義中庸講疏孔子正言老子講疏凡二百餘卷並正先儒之迷開古聖之旨王侯朝臣皆奉表質疑高祖皆爲解釋修飾國學增廣生員立五館置五經博士天監初則何佟之賀瑒嚴植之明山賓等覆述制旨并撰吉凶軍賓嘉五禮凡一千餘卷高祖稱制斷疑於是穆穆恂恂家知禮節大同中於臺西立士林館領軍朱異太府卿賀琛舍人孔季秩等遞相講述皇太子宣城王亦於東宮宣猷堂及揚州解開講於是四方郡國趨學向風雲集於京師矣兼篤信正法猶長釋典製涅槃大品淨名三慧諸經義記復數百卷聽覽餘閒卽於重雲殿及同泰寺講說名僧碩學四部聽衆常萬餘人又造通史躬製贊序凡六百卷天情睿敏下筆成章千賦百詩直疏便就皆文質彬彬超邁今古詔銘贊誄箴頌戲奏爰初在田泊登寶曆凡諸文集又百二十卷六藝備閑棋登逸品陰陽緯侯卜筮占決並悉稱善又撰金策三十卷草諫尺牘騎射弓馬莫不奇妙勤於政務孜孜無怠每至冬月四更竟卽把燭看事執筆觸寒手爲皴裂糾姦擿伏洞盡物情常哀矜涕泣然後可奏日止一食膳無鮮腴惟豆羹糲食而已庶事繁擁日儻移中便嗽口以過身

衣布衣木綿皂帳一冠三載一被二年常克儉於身凡皆此類五十外便斷房室後宮職司貴妃以下六官祿輸三翟之外皆衣不曳地傍無錦綺不飲酒不聽音聲非宗廟祭祀大會饗宴及諸法事未嘗作樂性方正雖居小殿暗室恆理衣冠小坐押襖盛夏暑月未嘗褻袒不正容止不與人相見雖親內豎小臣亦如遇大賓也歷觀古昔人君恭儉莊敬藝能博學罕或有焉

史臣曰齊季告終君臨昏虐天棄神怒衆叛親離高祖英武睿哲義起樊鄧仗旗建號濡足救焚總蒼兕之師翼龍豹之陣雲驤雷駭翦暴夷凶萬邦樂推三靈改卜於是御鳳曆握龍圖開四門弘招賢之路納十亂引諒直之規興文學修郊祀治五禮定六律四聰既達萬機斯理治定功成遠安邇肅加以天祥地瑞無絕歲時征賦所及之鄉文軌傍通之地南超萬里西拓五千其中瓊財重寶千夫百族莫不充牣王府蹶角闕庭三四十十年斯爲盛矣自魏晉以降未或有焉及乎髦年委事羣倖然朱丹之徒作威作福挾朋樹黨政以賄成服冕乘軒由其掌握是以朝經混亂賞罰無章小人道長抑此之謂也賈誼云可爲慟哭者矣遂使滔天羯寇乘間掩襲驚羽流王屋金契辱乘與塗炭黎元黍離宮室嗚呼天道何其酷焉雖曆數斯窮蓋亦人事然矣

簡文帝本紀

按梁書簡文帝本紀太宗簡文皇帝諱綱字世纖小字六通高祖第三子昭明太子母弟也天監二年十月丁未生於顯陽殿五年封晉安王食邑八千戶八年爲雲麾將軍領石頭戍軍事量置佐吏九年遷使持節都督南北兗青徐冀五州諸軍事宣毅將軍南兗州刺史十二年入爲宣惠將軍丹陽尹十三年出爲使持節都督荆雍梁南北秦益寧七州諸軍事南蠻校尉荊州刺史將軍如故十四年徙爲都督江州諸軍事雲麾將軍江州刺史持節如故十七年徵爲西中郎將領石頭戍軍事尋復爲宣惠將軍丹陽尹加侍中普通元年出爲使持節都督益寧雍梁南北秦沙七州諸軍事益州刺史未拜改授雲麾將軍南徐州刺史四年徙爲使持節都督雍梁南北秦四州郢州之竟陵司州之隨郡諸軍事平西將軍寧蠻校尉雍州刺史五年進號安北將軍七年權進都督荆益南梁三州諸軍事是歲丁所生穆貴嬪喪上表陳解詔還攝本任中大通元年詔依先給鼓吹一部二年徵爲都督南揚徐二州諸軍事驃騎將軍揚州刺史三年四月乙巳昭明太子薨五月景申詔曰非至公無以主天下非博愛無以臨四海所以堯舜克讓惟德是與文王舍伯邑考而立武王格于上下光于四表今岱宗宗落天步艱難淳風猶鬱黎民未又自非克明克哲允武允文豈得荷神器之重嗣龍圖之尊晉安王綱文義生知孝敬自然威惠外宣德行內敏羣后歸美率土宅心可立爲皇太子七月乙亥臨軒策拜以修繕東宮權居東府四年九月移還東宮

太清三年五月景辰高祖崩辛巳卽皇帝位詔曰朕以不造夙丁閔凶大行皇帝奄棄萬國攀慕號咷厝身靡所損以寡德越居民上焚柴在疚罔知所託方賴藩輔社稷用安謹遵先旨顧命遺澤宜加億兆可大赦天下壬午詔曰育物惟寬馭民惟惠道著典王本非隸役或開奉國便致擒擄或在邊疆濫被抄掠二邦是競黎元何罪朕以寡昧創承鴻業既臨率土化行宇宙豈欲使彼獨爲匪民諸州見在北人爲奴婢者并及妻兒悉可原放癸未追諡妃王氏爲簡皇后六月戊戌以南康嗣王會理爲司空丁亥立宣城王大器爲皇太子壬辰封當陽公大心爲尋陽郡王石城公大款爲江夏郡王寧國公大臨爲南海郡王臨城公大連爲南郡王西豐公大春爲安陸郡王新塗公大成爲山陽郡王臨湘公大封爲宜都郡王秋七月甲寅廣州刺史元景仲謀應侯景西江督護陳霸先起兵攻之景仲自殺霸先迎定州刺史蕭勃爲刺史戊辰以吳郡置吳州以安陸王大春爲刺史庚午以司空南康嗣王會理兼尚書令南海王大臨爲揚州刺史新興王大壯爲南徐州刺史是月九江大饑人相食十四五月八月癸卯征東大將軍開府儀同三司南徐州刺史蕭淵藻薨冬十月丁未地震十二

月百濟國遣使獻方物

大寶元年春正月辛亥朔以國哀不朝會詔曰蓋天下者至公之神器在昔三五不復已而臨蒞之故帝王之功聖人之餘事軒冕之華儻來之一物太祖文皇帝舍光大之量啓西伯之基高祖武皇帝道洽二儀智周萬物屬齊季薦瘞彝倫剝喪同氣離入苑之

禍元首懷無厭之欲乃當樂推之運因億兆之心承彼倚角雪茲讎恥事非爲己義實從民故功成弗居卑宮非貪大慈之業普薰汾陽之詔屢下於茲四紀無得而稱朕以寡昧哀矜孔棘生靈已盡志不圖全僂俛視陰企承鴻緒懸旌履薄未足云喻痛甚愈遲諒闇彌切方當元默在躬栖心事外即王道士道未直天步猶艱式憑宰輔以弘庶政履端建號仰惟舊章可大赦天下改太清四年爲大寶元年丁未天雨黃沙已未太白經天辛酉乃止西魏寇安陸執司州刺史柳仲禮盡沒漢東之地景寅月晝見癸酉前江都令祖皓起義襲廣陵斬賊南兖州刺史董紹先侯景自率水步軍擊皓二月癸未景攻陷廣陵皓等竝見害景戌以安陸王大春爲東揚州刺史省吳州如先爲郡詔曰近東垂擾亂江陽縱逸上宰運謀猛士雄奮吳會肅清濟兗澄謐京師畿內無事戎衣朝廷達官齋內左右竝可解嚴乙巳以尚書僕射王克爲左僕射是月邵陵王綸自尋陽至於夏口郢州刺史南平王恪以州讓綸景午侯景逼太宗幸西州夏五月庚午征北將軍開府儀同三司鄱陽嗣王範薨自春迄夏大饑人相食京師尤甚六月辛巳以南郡王大連行揚州事庚子前司州刺史羊鴉仁自尚書省出奔西州秋七月戊辰賊行臺任約寇江州刺史尋陽王大心以州降約是月以南郡王大連爲江州刺史八月甲午湘東王繹遣領軍將軍王僧辯率衆逼郢州乙亥侯景自進位相國封二十郡爲漢王邵陵王綸棄郢州走冬十月乙未侯景又逼太宗幸西州曲宴自加宇宙大將軍都督六合諸軍事立皇子大鈞爲

西陽郡王大威爲武寧郡王大球爲建安郡王大昕爲義安郡王大摯爲綏建郡王大圓爲樂梁郡王壬寅景害南康嗣王會理十一月任約進據西陽分兵寇齊昌執衡陽王獻送京師害之湘東王繹遣前寧州刺史徐文盛督衆軍拒約南郡王前中兵張彪起義於會稽若邪山攻破浙東諸縣

二年春二月邵陵王綸走至安陸董城爲西魏所攻軍敗死三月侯景自率衆西寇丁未發京師自石頭至新林舳舻相接四月至西陽乙亥景分遣僞將朱子仙任約襲郢州景子執刺史蕭方諸閏月甲子景進寇巴陵湘東王繹所遣領軍將軍王僧辯連戰不能克五月癸未湘東王繹遣游擊將軍胡僧祐信州刺史陸法和援巴陵景遣任約率衆拒援軍六月甲辰胡僧祐等擊破任約擒之乙巳景解圍宵遁王僧辯督衆軍追景庚申攻魯山城克之獲魏司徒張化仁儀同門洪慶辛酉進圍郢州下之獲賊帥宋子仙等郢陽王故將侯瑱起兵襲僞儀同于慶于豫章慶敗走秋七月丁亥侯景還至京師辛丑王僧辯軍次益城賊行江州事范希榮棄城走八月景午晉熙人王僧振鄭寵起兵襲郢州城僞晉州刺史夏侯威生儀同任延遁走戊午侯景遣衛尉卿彭儒公王僧貴率兵入殿廢太宗爲晉安王幽於末福省害皇太子大器尋陽王大心西陽王大鈞武寧王大球義安王大昕及尋陽王諸子二十人矯爲太宗詔禪於豫章嗣王棟大赦改年遣使害南海王大臨於吳郡南郡王大連於姑孰安陸王大春於會稽新興王大壯於京口冬十月壬寅帝謂舍人殷不害曰吾昨夜夢吞

土卿試爲我思之不害曰昔重耳餓塊卒還晉國陛下今夢將符是乎及王偉等進觴於帝曰丞相以陛下憂憤既久使臣上壽帝笑曰壽酒不得盡此乎於是竝賁酒餽曲項琵琶與帝飲帝知不免乃盡酣曰不圖爲樂一至於斯既醉寢偉乃出僞進士囊王修集坐其上於是太宗崩於末福省時年四十九賊僞諡曰明皇帝廟稱高宗明年三月癸丑王僧辯率前百官奉梓宮升朝堂世祖追崇爲簡文皇帝廟曰太宗四月乙丑葬莊陵初太宗見幽繫題壁自序云有梁正士蘭陵蕭世續立身行道終始如一風雨如晦鷄鳴不已弗欺暗室豈况三光數至於此命也如何又爲連珠二首文甚悽愴太宗幼而敏睿識悟過人六歲便屬文高祖歎曰此子吾家之東阿既長器宇寬弘未嘗見愠喜方類豐下須餐如畫舸睇則目光燭人讀書十行俱下九流百氏經目必記篇章辭賦操筆立成博綜儒書善言元理自年十一便能親庶務歷試蕃政所在有稱在穆貴嬪憂哀毀骨立晝夜號泣不絕聲所坐之席沾濕盡爛在襄陽拜表北伐遣長史柳津司馬董當門壯武將軍杜懷寶振遠將軍曹義宗等衆軍進討寇平南陽新野等郡魏南荊州刺史李志據安昌城降拓地千餘里及居監撫多所弘宥文案簿領纖毫不可欺引納文學之士賞接無倦恆討論篇籍繼以文章高祖所製五經講疏嘗於元圃奉述聽者傾朝野雅好題詩其序云余七歲有詩癖長而不倦然傷於輕艷當時號曰宮體所著昭明太子傳五卷諸王傳二十卷禮大義二十卷老

子義二十卷莊子義二十卷長春義記一百卷法寶連璧三百卷並行於世焉

史臣曰太宗幼年聰睿令聞風標天才縱逸冠於今古文則時以輕華爲累君子所不取焉及養德東朝聲被中外泊乎繼統實有人君之懿矣方符文景運鍾屯剝受制賊臣弗展所蘊終罹懷愍之酷哀哉

元帝本紀

按梁書元帝本紀世祖孝元皇帝諱繹字世誠小字七符高祖第七子也天監七年八月丁巳生十三年封湘東郡王邑二千戶初爲寧遠將軍會稽太守入爲侍中宣威將軍丹陽尹普通七年出爲使持節都督荆湘鄧益寧南梁六州諸軍事西中郎將荊州刺史中大通四年進號平西將軍大同元年進號安西將軍三年進號鎮西將軍五年入爲安右將軍護軍將軍領石頭戍軍事六年出爲使持節都督江州諸軍事鎮南將軍江州刺史太清元年徙爲使持節都督荆雍湘司鄧寧梁南北秦九州諸軍事鎮西將軍荊州刺史三年三月侯景寇沒京師四月太子舍人蕭歆至江陵宣密詔以世祖爲侍中假黃鉞大都督中外諸軍事司徒承制餘如故是月世祖徵兵於湘州湘州刺史河東王譽拒不遣十月景午遣世子方等帥衆討譽戰所敗死是月又遣鎮兵將軍鮑泉代討譽九月丁卯雍州刺史岳陽王督舉兵反來寇江陵世祖嬰城拒守乙丑督將杜則與其兄弟及楊混

各率其衆來降景寅督遁走鮑泉攻湘州不克又遣左衛將軍王僧辯代將

大寶元年世祖猶稱太清四年正月辛亥朔左衛將軍王僧辯獲橋三十子共帶以獻二月甲戌衡陽內史周弘直表言鳳凰見郡界夏五月辛未王僧辯克湘州斬河東王譽湘州平六月江夏王大款山陽王大成宜都王大封自信安間道來奔九月辛酉以前鄧州刺史南平王恪爲中衛將軍尚書令開府儀同三司中撫軍將軍世子方諸爲鄧州刺史左衛將軍王僧辯爲領軍將軍改封大款爲臨川郡王大成爲桂陽郡王大封爲汝南郡王是月任約進寇西陽武昌遣左衛將軍徐文盛右衛將軍陰子春太子右衛率蕭慧正爲州刺史席文獻等下武昌拒約以中衛將軍尚書令開府儀同三司南平王恪爲荊州刺史鎮武陵十一月甲子南平王恪侍中臨川王大款桂陽王大散散騎常侍江安侯圓正侍中左衛將軍張綰司徒左長史曇等府州國一千人奉牋曰竊以嵩岳既峻山川出雲大國有蕃中甫惟翰豈非皇建斯極以位爲寶聖教辦方慎名與器是知太尉佐帝重華表黃玉之符司空相土伯禹降元珪之錫伏惟明公大王殿下命世應期挺生將聖忠爲令德孝實天經地切應韓寄深旦夷五品斯訓七政以齊志存社稷功濟屯險外寇內侵枕戈泣血鯨鯢未掃投袂勤王能使遊魂請盟以屈膝醜徒衛壁而警氣親蕃外叛聲均吳楚義討威兵不血刃湘波自息非築杜陵之壘峴山離貳不伐劉表之城九江致梗二別殊派纔命戈船底定灝霍沂流窮討路絕窺窬敵兵侵

界鐵馬霧合神規獨運皆即鼻懸翻同翅折遂修職貢梁漢合契肆犀利之兵巴漢俱下竭驍勇之陣南通五嶺北出力原東裔不怨西戎即序可謂上流千里持戟百萬天下之至貴四海之所推也今海水飛雲崑山起燎魏文悲樂推之歲韓宣歎成禮之日陽臺之下獨有冠蓋相趨夢水之傍尚致車輿結轡舞麥兩穗出於南平之邦甘露泥枝降乎當陽之境野蠶自績何謝歐絲閒田生稻罕殊雨粟莫非物咸亨是稱文明光大豈可微號不彰於彝典明試不陳乎車服者哉昔晉鄭入周尚作卿士蕭曹佐漢且居相國宜崇茲盛禮顯答羣望格等稽尋甲令博詢惇史謹再拜上進位相國總百揆竹使符一別准恆儀杖金斧以窮逆暴乘玉輅而定社稷傍羅麗於日月貞明合於天地扶危翼治豈不休哉恪等不通大體自昧伏奏以聞世祖令答曰數鍾陽九時惟百六鯨鯢未翦寤寐痛心周粵天官秦稱相國東至於海西至於河南次朱鸞北漸元塞率茲小宰弘斯大德將何用繼蹤曲阜擬跡桓文終建一匡肅其五拜雖義屬隨時事無虛紀傳稱皆讓讓著鳴謙瞻言前典再懷哽噎十二月壬辰以定州刺史蕭勃爲鎮南將軍廣州刺史遣護軍將軍尹悅巴州刺史王珣定州刺史杜多安率衆下武昌助徐文盛

大寶二年世祖猶稱太清五年二月己亥魏遣使來聘三月侯景悉兵西上會任約軍閏四月景午景遣其將朱子仙任約襲鄧州執刺史蕭方諸戊申徐文盛陰子春等奔歸王珣尹悅杜多安並降賊庚戌領軍將軍王僧辯率衆屯巴陵甲子景進寇巴陵五月

癸未世祖遣游擊將軍胡僧祐信州刺史陸法和帥眾下援巴陵任約敗景遂遁走以王僧辯為征東將軍開府儀同三司尚書令胡僧祐為領軍將軍陸法和為護軍將軍仍令僧辯率眾軍追景所至皆捷八月甲辰僧辯下次淦城辛亥以鎮南將軍湘州刺史蕭方矩為中衛將軍司空征南將軍南平王恪進號征南大將軍湘州刺史餘如故九月己亥以征東將軍開府儀同三司尚書令王僧辯為江州刺史餘如故盤盤國獻馴象冬十月辛丑朔有紫雲如車蓋臨江陵城是月太宗崩侍中征東將軍開府儀同三司江州刺史尚書令長寧縣侯王僧辯奉表曰眾軍薄伐塗次九水即日獲臨城縣使人報稱侯景弑逆皇帝賊害太子宗室在寇庭者並罹禍酷六軍慟哭三辰改曜哀我皇極四海崩心我大梁纂堯緒基商啓祚太祖文皇帝徇齊作聖肇有六州高祖武皇帝聰明神武奄龕天下依日月而和四時履至尊而制六合麗正居貞大橫固社四葉相係三聖同基蠢爾凶渠遂憑天邑閭閻受白登之辱象魏致堯城之疑雲展承華一朝俱酷金楨玉幹莫不同冤悠悠彼蒼何其罔極臣聞喪君有君春秋之茂典以德以長先王之通訓少康則牧豕撫職祀夏所以配天平王則居正東遷宗周所以卜世漢光以能捕不道故景歷重昌中宗以不違羣議故江東可立籌今考古更無二謀伏惟陛下至孝通幽英武靈斷當七九之厄而應千載之期啓殷憂之明而居百王之會取威定霸險阻艱難建社治兵載循古道家國之事一至於斯天祚大梁必將有主軒轅得姓存者二人高祖五王

代實居長乘屈完而陳諸侯拜子武而服大輅功齊九有道濟生民非奉聖明誰嗣下武臣聞日月貞明太陽不可以闕照天地貞觀乾道不可以久惕黃屋左纛本為億兆而尊尊輟龍章蓋以郊禋而貴寶器存乎至重介石慎於易差黔首豈可少選無君宗祏豈可一日無主伏願陛下掃地升中柴天改物事迫凶危運鍾擾攘蓋不勞宗正奉詔博士擇時南面即可居尊西向無所讓德四方既知有奉八百始可同期殘寇潛居器藏社處乾象既傾坤儀已覆斬莽觀車燒卓照市廓清函夏正為堊陵開雪宮闈庶存鐘鼎彼黍離離伊何可言陛下繼明開祚即宮舊楚左廟右社之制可以權宜五禮六樂之容歲時取備金芝九莖瓊茅三春要衛率職尉候相望坐廟堂以朝四裔登靈臺而望雲物禪梁甫而封泰山臨東濱而禮日觀然後與三事大夫更謀都鄙左漣右澗來維可以為居抗殿疏龍惟王可以在鎬何必勤勤建業也哉臣等不勝控款之至謹拜表以聞世祖奉諱大臨三日百官縞素乃答曰孤以不德天降之災枕戈飲膽扣心泣血風樹之酷萬始不追霜露之哀百憂總萃甫聞伯升之禍彌切仲謀之悲若封豕既殲長蛇即戮方欲追延陵之逸軌繼子臧之高讓豈資秋亭之壇安事繁陽之石侯景項籍也蕭棟殷辛也赤泉未賞劉邦尚曰漢王白旗弗懸周發猶稱太子飛龍之位孰謂可躋附鳳之徒既聞來議羣公卿士其論孤之志無忽司空南平王恪率宗室五千餘人領軍將軍胡僧祐率羣僚二百餘人江州別駕張佚率吏民三百餘人並奉牋勸進世祖固讓十一月乙亥

王僧辯又奉表曰紫宸曠位赤縣無主百靈變動萬國回皇雖醉醒相扶同歸景毫式歌且誦總赴唐郊猶懼陛下俯首潛然讓德不嗣傳車在道方慎宋昌之謀法駕已陳尚杜耿純之勸岳牧翹首天民累息臣聞星回日薄擊雷鞭電者之謂天嶽立川流吐霧蒸雲者之謂地苞天地之混成洞陰陽之不測而以裁成萬物者其在聖人乎故云天地之大德曰生聖人之大寶曰位黃屋廟堂之下本非獲已而居明鏡四衢之錦蓋由應物取訓伏惟陛下稽古文思英雄特達比以周且則文王之子方之放勳則帝摯之季千年且暮可不在此斯庭闕湮亡鐘鼎淪覆嗣膺景歷非陛下而誰豈可使赤眉更立盆子隗囂託置高廟陛下復從容高讓用執謙光展其矯行偽書誣罔正朔見機而作斷可識矣匪疑何卜無待著龜日者公卿失取禍纏霄極侯景憑陵奸臣互起率戎伐類無處不然勸明誅晉側足皆爾刁斗夜鳴烽火相照中朝人士相顧銜悲涼州義徒東望殞涕襟襟黔首將欲安歸陛下英略緯天沈明內斷橫創泣血枕戈嘗膽農山圯下之策金匱玉鼎之謀莫不定算屢帷決勝千里擊靈鼉之鼓而建翠華之旗驅六州之兵而總九伯之伐四方雖虞一戰以霸斬其鯨鯢既彰大戮荷校滅耳莫匪奸回史不絕書府無虛月自洞庭安波彭蠡底定文昭武穆芳若椒蘭敵國降城和如親戚九服同謀百道俱進國恥家怨計期就雪社稷不墜繫在聖明今也何時而申帝啓之避凶危若此方陳泰伯之辭國有具臣誰敢奉詔天下者高祖之天下陛下者萬國之歡心萬國豈可無君高祖豈